

28538

樂大典

卷 〇〇九三	卷 〇〇九二	卷 〇〇九一	卷 〇〇九〇	卷 〇〇八九	卷 〇〇八八
師 字	師 字	師 字	師 字	師 字	師 字

永樂大典卷之九百二十 二支

師

太子三師

禮記文王世子曰凡三王教世子必以禮樂樂所以修內也禮所以修外也禮樂交錯於中發形於外故

其成也懌恭教而溫文又曰立太傅少傅以養之欲其知父子君臣之道也太傅審父子君臣之道以示之少傅奉世子以觀太傅之德行而審喻之太傅在前少傅在後入則有保出則有師是以教喻而德成也師也者教之以事而喻諸德者也保也者慎其身以輔翼之而歸諸道者也記曰虞夏商周有師保可疑丞設四輔及三公不必備惟其人語使能也數類太子三師三少是為六傅太傅太師太保少傅少保少師又曰六傅晉史曰愍懷建宮乃置六傅三太三少自元康之後諸傅或二或三或四或五隋書百官志太子太師太傅太保是為三師掌師範訓導輔翼皇太子唐書百官志東宮官太子太師太傅太保各一人從一品掌輔導皇太子每見迎拜殿門三師答拜每門必讓三師坐太子乃坐與三師書前名惶

恐後名惶恐再拜。太子出則乘輅。備鹵簿。以從。少師少傅少保各一人。從二品。掌曉三師德行。以諭皇太子。奉太子以觀三師之道德。自太師以下。唯其人不必備。先天元年開府置令丞各一人。隸詹事府。尋廢。唐六典。太子太師一人。太傅一人。太保一人。並從一品下。史記秦孝公使商鞅設法。而黜太子師傅。則秦有其職也。漢氏唯置太傅。秩二十石。屬官有太子門大夫庶子。洗馬。舍人。員。後漢太子太傅。秩中二千石。掌輔導太子禮。如師。不領官屬。至魏太子太傅為第三品。漢魏故事。皇太子於二傅執弟子禮。皆為書。不曰令。太傅於太子不稱臣。晉初東宮不置詹事。事由二傅少傅立草。太傅書真。以為儲副體尊。遂令諸公居之。而本司位重。或行或領也。咸寧中備六傅之職。明陵公何邵為太子太師。避景帝諱。改為明。安豐侯王戎為太傅。武陵侯楊濟為太保。其後或置或省。懷帝為太弟。又備六傅。東晉明帝在儲宮。置保傅之位。而無二師。晉令太子太保品第三。進賢兩梁冠。絳朝服。佩水蒼玉。銀章青綬。宋齊梁並不置。後魏北齊置之。正第二品。號東宮三太。後周不置。隋氏置之。正第三品。皇朝因之。而加其秩。太子出則乘輅備儀。太子三師。以道德輔教太子者也。至於動靜起居言語視聽。皆有以師焉。兩府元龜長孫無忌為司徒。定策立晉王為太子。太宗以

無忌為太子太師房玄齡蕭瑀為傅保制曰明兩之重寔國宗祧輔導之職莫先師係是以呂望召奭騰芳於有周叔孫玄成繼美於隆漢司徒趙國公無忌器範宏邈風鑒秀遠材稱棟幹地兼姻戚佐命之功勒乎鍾鼎論道之譽穆乎台槐股肱是屬邦國攸賴教諭少陽僉望斯在司空梁國公玄齡體業忠肅識具弘通誠著霸圖功宣鼎業奉上之節所懷必盡益國之事知無不為必能厲茲六行審喻三善特進宋國公瑀操行清約識局貞正夙受先遇早升朝右立身之操必在於直道體國之心無忘於忠義輔翼儲貳望實攸歸無忌可太子太師玄齡可太子太傅瑀可太子太保又以黃門侍郎褚遂良為太子賓客鄭氏譚綺稱太師太傅太保曰春官三師唐會要皇太子見三師禮貞觀十二年七月禮部尚書王珪兼魏王師上問黃門侍郎韋挺曰秦昨與珪相見若為禮節挺對曰見師之禮拜答如儀詔王問珪忠孝珪答曰陛下主之君也事君思盡忠陛下主之父也事父思盡孝忠孝之道可以享天祐餘芳可以垂後葉王曰忠孝之道已聞教矣願聞所習珪曰漢東平王蒼云為善最樂上曰我嘗語秦汝之事師如事我也秦每先拜珪珪亦以師道自居物議善之十七年四月二十一日上謂房玄齡蕭瑀曰太子三師以德導人者也若師禮卑則

太子無所取則於是詔令撰三師儀注。太子出殿門迎。先拜三師。答拜。每門讓三師坐。太子乃坐。與三師書前名惶恐。後名惶恐。再拜其年。皇太子承乾失德。魏王有奪嫡之漸。內外疑議。上惡之。謂侍臣曰。當令朝臣忠譽無踰魏徵。我遣傳皇太子。用絕天下之望。及草詔曰。徵其辭乎。皆曰。徵已拜侍中。必不受。師傳上曰。徵識吾此意。當不固辭。及詔為太子太師。徵自陳有疾。詔答曰。漢之太子。四皓為助。我之賴卿。即其義也。知公疾病。可則護之。即拜而奉詔。其年四月。英公勣為特進太子詹事。仍同中書門下三品。上謂勣曰。我兒新登儲兩。卿舊長史。今以官事相委。故有此授。屈資勿唯也。以孤思之。無越卿者。公往不遺。李密。今豈負於朕哉。勣雪淚致詞以謝。是月。詔宰臣劉洎。岑文本。褚遂良。往東宮與皇太子遊處。為賓客。初。洎上疏。以皇太子初立。宜尊師重學。與正人遊。故上嘉歎其行焉。大和八年十月。太常禮院奏。今月十七日。皇太子與太師相見。請前一日。開崇明門。內外門。所司陳設。依奏。開成三年四月。勅宜令師保。賓客詹事。左右春坊五品已上官。每至朔望日。伏下後。與前件官詣崇明門。謁見皇太子。其一官兩員已上者。任分番。如遇陰雨。休假。及輟放。並權停。其年八月。勅太子太師鄭覃。每月與賓詹。左右春坊五品已上官。謁見皇太子。宜令每月更

添一日。以二十六日。二十二日。詣崇明門謁見。若遇陰雨休假。及輟朝。放朝。即取以次雙日。餘准今年四月勅處分。九月勅太子太師及東宮官。每月二十六日詣崇明門謁皇太子宜傳。

師氏

書顧命篇。師氏。訓師氏。大夫官。周禮地官司徒。師氏。中大夫一人。上士二人。府二人。史二人。胥十有二人。

徒百有二十人。師氏掌以徽詔王。以三德教國子。一曰至德。以爲道本。二曰敏德。以爲行本。三曰孝德。以知逆惡。教三行。一曰孝行。以親父母。二曰友行。以尊賢良。三曰順行。以事師長。居虎門之左。司王朝。掌國中失之事。以教國子弟。凡國之貴遊子弟學焉。凡祭祀賓客。會同喪紀。軍旅。王舉則從。聽治亦如之。使其屬帥四夷之隸。各以其兵服守王之門外。且蹕朝在野外。則守內列。元豫章熊朋來集。師氏之官。諸儒或以爲周召之職。公孤之副。愚按。武王之在牧野。固以亞旅師氏。叙於司徒司馬司空之下。則公孤之外。別有師氏之官。故其秩爲中大夫。爲上士。會同軍旅。王舉則從。使虎賁兵服之士屬焉。皆不忘牧野時。宋呂東萊集。周師氏箴。諫之。

道有三難焉。曰遠。曰疎。曰驟。遠則勢不接。疎則情不通。驟則理不究。其言之不行也固也。彼周設師氏之官。淵乎其用意之深乎。師氏之官。實居虎門之左。而詔王以熾者也。其勢近。其情親。其言漸。若江海之浸膏澤之潤。日加益而不知焉。周公之設官三百六十。官必掌一事。事必寓一意。而師氏獨列地官之屬。實周公致意之深者。想夫成周之隆。出入起居同歸於欽。發號施令同歸於臧者。師氏抑有助焉。昔周太史辛甲。命百官官箴王闕。而虞人之箴獨傳。竊意師氏之所獻。必反覆絢繹。辭頗意篤。足以為百代箴規之法。然求之於蠹書漆簡之中。雖斷章片辭。邈不可得。是可歎已。用敢追述其事。而為箴曰。若昔忠臣格君之非。啓心沃心。日化月移。雖有嘉猷。情或未信。勢疎地遠。千說一聽。蒼周之興。稽古建官。左右賢俊。治格多盤。時惟師氏。詔王以熾。翼以入之。曰義曰理。原念熾惡。水火背馳。火盛水竭。熾勝惡微。燕閒穆清。誠意懇款。先養所長。姑置所短。性復其源。善迎其端。輔翼聖學。功不可刊。侈麗之欲。將發復止。暴慢之慮。將萌復已。師師之諫。惟一惟精。君失無迹。我諫無形。於惟辟王。獨制萬衆。必求峻賢。舉以自近。旦承暮弼。前贊

後褻氣體默移其道大光苟不鑑此正直屏弃僕隸之臣諾諾唯唯堂下日遠堂上日高雖復虛宇焉知民勞聖人復作斯理不易小臣

司規敢
告執戟

國師

馬明史實錄漢王莽以劉歆為國師歆後自殺史以訢為國師莽傳又號國師云後魏劉延明隱居酒泉教授為

業蒙避禮待月致羊酒牧捷尊為國師親自致拜命官屬以下皆北面受業本傳梁書王承傳承僕駙驥子七歲通周易選補國子生年十五射策高第除祕書郎歷太子舍人後為國子博士時膏腴貴遊咸以文學相尚罕以經術為業惟承獨好之發言吐論達次儒者在學訓諸生述禮易義中大通五年遷長史兼侍中俄轉國子祭酒承祖儉及父暕嘗為此職三世為國師前代未有也宋史列傳宇文虛中建夫中資政殿大學士為祈請使使金國為金人所拘留虛中有才金人加以官爵後累官進金紫光祿大夫金人號為國師元史鐵歌傳憲宗尊鐵歌叔那摩為國師張立道傳立道奉使安南傳上命曉之日導曰公大國之卿小國之師也

龜茲

國師

晉書鳩摩羅什傳羅什出家東度葱嶺。茲王聞其名郊迎之請為國師。

三帝國師

唐張說集大通禪師碑。詔請西來趺座親君肩輿上殿。屈萬乘而稽首。酒九重而宴居。傳聖道者不北。面有盛德者無臣禮。遂推為兩

京法主。三帝國師。

天使國師

岳珂程史宋施宜生。福人也。後為虜中禮部尚書。方顯時有龜山僧至其

國。言于亮而尊顯之。俾乘驛至京東視海舟號天使國師。

三藏國師

元史本紀至順二年特命沙津愛護

持必剌忒納失里。為三藏國師。賜玉印。又釋老傳其年。又賜必蘭納識理玉印。加號普覺圓明廣照弘辯三藏國師。灌頂

國師

元史順帝紀。至元三年十二月西域僧加刺麻至京師。號灌頂國師。賜玉印。

高麗國師

高麗國經國師之稱。蓋如中國之有僧職綱維也。其上一等謂之王師。王見則拜之。皆服山水衲袈裟。長袖偏衫。金趺遮。下有紫裳烏革鈴履。人物衣服雖略與中華同。但高麗人大抵首無挽骨。以僧視髮乃見之。頗可駭訝。晉史謂三韓之人初生子。便以石壓其頭。令扁非

也。蓋由種類資稟而然。未必因石而扁。

詔爲國師

佛祖統紀云。北齊文宣詔高僧法常爲國師。又勅曇延法師爲

大統尊爲國師。

武后勅神秀禪師入京行道。歷三朝。皆禮爲國師。肅

宗詔南陽惠忠禪師入見。號稱國師。

代宗詔南岳法照爲國師。憲宗

賜沙門知玄悟達國師封澄觀大統清涼

國師。吳越王錢俶奉沙門德韶爲國師。

宗師

玉海漢平紀。元始五年正月。詔祭明堂。諸侯王二十八人。列侯

百二十人。宗室子九百餘人。召助祭。禮畢。封孝宣曾孫信等三

十六人爲列侯。餘益戶。賜爵。金帛。補吏。各有差。詔曰。惟宗室子皆太祖高

皇帝子孫。及兄弟。吳頃楚元之後。漢元至今。十有餘萬。人莫能相糾。或陷

入刑罪。其爲宗室自太上皇以來。族親各以世氏郡國置宗師。以糾之。致

教訓焉。二十石。選有德義者。蓋聞帝王以德撫民。其次親親。以相及也。昔

堯睦九族。舜傳叙之。朕以皇帝幼年。且統國政。惟宗室子皆太祖高皇帝

子孫。及兄弟。吳頃楚元之後。漢元至今。十有餘萬。人雖有王侯之屬。莫能

相糾。陷入刑罪。教訓不至之咎也。傳不云乎。君子篤於親。則民興於仁。其

爲宗室自太上皇以來。族親各以世氏郡國置宗師。以糾之。致教訓焉。二

千石。選有德義者以為宗師。考察不從教令有寃失職者。宗師得因郵亭
 書言宗伯。請以聞。常以歲正月賜宗師帛各十匹。東漢書李通傳。通字
 次元。南陽宛人也。世以貨殖著姓。父守身長九尺。容貌絕異。為人嚴毅。居
 家如官廷。初事劉歆。好星歷讖記。為王莽宗卿師。平帝五年。王莽攝政。郡
 國置宗師。以主宗室。蓋持尊之故。曰宗卿師。李守為莽宗卿師。盧植獻書
實武曰。宜依古禮置諸子之官。召王侯愛子。宗室賢才。崇訓導之義。簡其
良能。隨用爵之。強幹弱枝之道也。晉武帝紀。咸寧三年春正月丙子朔。
 詔曰。召穆公糾合兄弟。而賦常之詩。此姬氏所以本支百世也。今以衛
 將軍扶風王亮為宗師。所當施行。甘諾之。汝南王亮傳。晉宗室盛無以
 統攝。以亮為宗師。訓導觀察。有不遵禮法。小者正以義方。大者隨事聞奏。
梁王彤亦為宗師。彭城王祐領大宗師。宋晉者。魏書官氏志。初以八國姓
 族難分。故國立大師小師。令辨其宗黨。品舉人才。自八國以外。郡各自立
 師。職分如八國。比今之中正也。宗室立宗師。亦如州郡八國之儀。職官
 志。宗正統皇族。宗人圖牒。哀帝省并太常。元魏天賜元年十一月。命宗
 室置宗師。八國州郡各置師以辨宗黨。舉才如魏晉中正之職。太和二
 十二年。以彭城王勰為宗師。有不遵教典。隨事以聞。西魏廣陵王欣為大

宗師。後周有宗師中大夫。資治通鑑唐高祖武德二年二月丙戌。詔諸宗姓居官者。在同列之上。未仕者。見其徭役。每州置宗師一人。以總攝別為團伍。會要。詔宗緒之情義。越常品。宜有旌異。以明等級。天下諸宗姓任官者。宜在同列之上。無職任者。不在徭役之限。每州置宗師一人。以相統攝。文苑英華。庾信。祀公讓宗師表。臣某言。伏見詔書。以臣為使持節驃騎大將軍開府儀同三司宗師中大夫。伏奉綸音。心魂震聳。臣聞堯分四岳。是以望秩山川。舜命九官。是以光華日月。必須易一作儀刑。以德明試。以功乃可。協和萬邦。咸熙庶績。臣幼無學植。長闕才成。鴻都之門。不能定其章句。雞鹿之塞。無以名其碑碣。憑天漢之派水。附弱木之分枝。東岳則朝宿有名。南宮則門閭有籍。在臣庸劣。文知滿盈。武陽以功臣之重。特拜宗卿。東平以母弟之尊。超登上將。臣有何德。能兼此榮。臣早傾庭蔭。曾未扶牆。母氏慈訓。哀矜勞苦。甫及成人。復無捐棄。几筵如在。恩離鞠育之恩。終天無報。叩地難任。欲草土丘陵。終身瑩域。霜露申履時之感。驚雀展迴翔之心。不悟天澤沛然。謬垂提掖。當今玉燭調和。既非金革之世。璿璣齊政。豈忘松楸之餘。况復一枝蹊曲。終危九層之臺。二服岑蹄。必傷千里之駕。皇帝欽明文思。先宅區宇。禮格四方。無容奪臣此志。孝治天下。自當哀

臣此情太宗為師更求同姓之國元戎參乘別選賢能之臣伏願覽青蒲之奏曲允微誠詔鳳凰之池特收嚴召則天慈無濫私願獲從臣之容身便當有地不任荒悵戰懼之誠謹詣朝堂奉表以聞

諸侯師

東漢書劉般傳般少時篤志修行誦誦不怠建武八年東至洛陽脩經學是年光武下詔封般為菑丘侯奉孝王祀

使就國徙封千秋侯十九年行幸沛詔問郡中諸侯行能太守薦言般束脩至行為諸侯師帝聞而嘉之乃賜般綬錢百萬緡帑二百匹唐柳宗元集送班孝廉觀省序外王父以將相之重九命赤社為諸侯師

先師

禮記文王世子凡學春官釋奠于其先師秋冬亦如之注官謂禮樂詩書之官周禮四凡有道者有德者使教焉此則以為樂

但。通祭於祭宗此之謂先師之類也。若漢禮有高堂生樂有制氏詩有毛公書有伏生亦可以為之也。凡始立學者必釋奠于先聖先師及行事必以幣註謂天子命之教始立學官者也。有國故則否註若唐虞有夔伯夷周有周公皆有孔子則各自異之不合也。始立學者既饗器用幣註告先

聖先師以器成。天子視學。乃命有司行事。興秩節。祭先聖先師焉。注。興。舉。秩。節。禮也。使有司攝其事。舉于禮。不親祭者。視學觀禮耳。非謂使教也。

東漢書孔僖傳。章帝過魯。幸闕里祠孔子。帝謂僖曰。今日之會。寧於卿宗有光榮乎。對曰。明王聖主。莫不尊師貴道。今陛下親屈萬乘。辱臨敝里。此乃崇禮先師。增輝聖德。至於光榮。非所敢承。儒學傳序。太宗貞觀六年。詔罷周公祠。以孔子為先聖。顏氏為先師。孔氏釋錄。太宗貞觀二年。房玄齡建言。周公仲尼皆聖人。然釋奠于學。以夫子大業以前。皆以孔子為先聖。以顏子為先師。別祀周公。尊孔子為先聖。以顏子為配。高宗顯慶二年。七月十一日。太尉長孫無忌等議曰。案新禮。孔子為先聖。顏子為先師。又准貞觀二十一年。以孔子為先聖。更以左氏等二十一人。與顏子俱配尼父太學。並為先師。今據永徽令。文改用周公為先聖。遂出孔子為先師。顏子左氏為從。據漢魏以來。取舍各異。顏子夫子互作先師。宣父周公迭為先聖。求其節文。適有得失。所以貞觀之末。親降綸言。依禮記之明文。酌康成之異說。正夫子為先聖。如衆儒為先師。永垂制於後昆。華往代。統緒仲尼生衰周之末。拯文喪之弊。祖述堯舜。憲章文武。弘至教於六經。闡儒風於千世。自漢以降。奕葉封侯。崇奉其聖。迄於今日。胡可降茲上哲。俯入先師。

今請改令從詔於義為允其周公仍依別禮配享武王詔從之。開元八年李元瓘奏稱先聖孔宣父廟先師顏子配坐十哲列象。七十子圖形于壁。唐撫言開元五年九月詔曰古有賓獻之禮登于天府揚于王庭重學尊師與賢進士能美風俗成教化蓋先王之跡焉朕以寡德欽若前政思與子大夫復臻于理故他日訪道有時忘食乙夜觀書分宵不寐晤專經之義薦學史之文永懷覃思有足尚者不示褒崇孰云獎勵其諸州鄉貢明經進士見訖宜令引就國子監謁先師學官為之開講質問其義宜令所司優厚設食兩館及監內得解舉人亦准此其日請資官五品已上及朝集使往觀禮即為常式易曰學以聚之問以辯之詩曰如切如磋如琢如磨此朕所望於習才也事物紀原唐書劉伯芻傳伯芻子允章咸通中為禮部侍郎請諸生及進士第並謁先師則茲禮起於唐懿宗之世劉允章請也又選舉志曰開元五年使令鄉貢明經進士見訖國子監謁先師是則開元之禮第施於貢士而咸通時允章所請糾開元貢士之禮而為之制也唐會要云開元五年五月八日也撫言又以為九月詔樂府詩集隋先聖先師歌無名氏誠夏經國立訓學重教先三墳肇開五典留篇開整理著陶鑄功宣東膠西序春誦夏弦芳塵載仰祀典無驚周子

遺文告先師文 敢昭告于先師究國公顏子爰以遷脩廟學成恭脩擇
萊于先聖至聖文宣王惟子睿性通微實幾於聖明誠道確夫子稱賢謹
以禮幣藻齋式陳明獻從祀配神尚饗宋楊誠齋集謁先師鄰國公文言
聖師者必曰孔孟言亞聖者必曰顏孟某諸生也初學為邑視事之三月
而首謁於先師禮也

算學先師

宋史本紀大觀三年詔算學以黃帝為先
師風后等八人配饗巫咸等七十人從祀

永樂大典卷之九百二十